

七十二家集

嵇中散集卷之五

魏譙國嵇康叔夜著

明閩漳張燮紹和纂

論

難宅無吉凶攝生論

夫神祇遐遠吉凶難明雖中人自竭莫得其端而易以惑道故夫子寢答於來問終慎神恠而不言是以古人顯仁於物藏用於身知其不可衆所共非故隱之彼非所明也吾無意於庶幾

而足下師心陋見斷然不疑繫決如此足以獨
斷思省來論旨多不通謹因來言以生此難方
推金木未知所在莫有食治世無自理之道法
無獨善之術苟非其人道不虛行禮樂政刑經
常外事猶有所疏况乎幽微者耶縱欲辨明神
微祛惑起滯立端以明所由斷以檢其要乃
爲微若但撮提羣愚蠶種忿而棄之因
謂無陰陽吉凶之理得無似噎而怨粒稼溺而
責舟楫者耶論曰百年之官不能令殤子壽八

逆魁圖不能令彭祖天又曰許負之相條侯英
布之黜而後王皆性命也應曰此爲命有所定
壽有所在禍不可以智逃福不可以力致英布
畏痛卒惟刀鋸亞夫忌餒終有餓患萬物萬事
凡所遭遇無非相命也然唐虞之世命何同延
長平之卒命何同短此吾之所疑也卽如所論
雖慎若曾顏不得免禍惡若桀跖故當昌熾吉
凶素定不可推移則古人何言積善之家必有
餘慶履信思順自天祐之必積善而後福應信

著而後祐來猶罪之招罰功之致賞也苟先積而後受報事理所得不爲闇自遇之也若皆謂之是相此爲決相命於行事定吉凶於知力恐非本論之意此又吾之所疑也又云多食不消必須黃丸苟命自當生多食何畏而服良藥若謂服藥是相之所一宅豈非是一耶若謂雖命猶當須藥自濟何知相不須宅以自輔乎若謂藥可論而宅不可說恐天下或有說之者矣旣曰壽夭不可求甚於貴賤而後曰善求壽強者

必先知灾疾之所自來然後可防也然則壽夭
果可求耶不可求也旣曰彭祖七百殤子之夭
皆性命自然而復曰不知防疾致壽去夭求實
於虛故性命不遂此爲壽夭之來生於用身性
命之遂得於善求然則夭短者何得不謂之愚
壽延者何得不謂之智苟壽夭成於愚智則自
然之命不可求之論奚所指之凡此數者亦雅
論之矛盾矣論曰專氣致柔少私寡欲直行情
性之所宜而合養生之正度求之於懷抱之內

而得之矣又曰善養生者和爲盡矣誠哉斯言
匪謂不然但謂全生不盡此耳夫危邦不入所
以避亂政之害重門擊柝所以避狂暴之灾居
必爽塏所以遠風毒之患凡事之在外能爲害
者此未足以盡其數也安在守一和而可以爲
盡乎夫專靜寡欲莫若單豹行年七十而有童
孺之色可謂柔和之用矣而一旦爲虎所食豈
非恃內而忽外耶若謂豹相正當給虎雖智不
免則寡欲何益而云養生可得若單豹以未盡

善而致災則輔生之道不止於一和苟和未足保生則外物之爲患者吾未知其所齊矣論曰師占成居則有驗使造新則無徵請問占成居而有驗者爲但占牆屋耶占居者之吉凶也若占居者而知盛衰此自占人非占成居也占成居而知吉凶此爲宅自有善惡而居者從之則當吉之人受災於凶宅妖逆無道獲福於吉居爾爲吉凶之致惟宅而已更令由人也新便無徵耶若吉凶故當由人則雖成居何得而云有

驗耶若此果可占耶不可占耶果有宅耶其無宅也論曰宅猶卜筮可以知吉凶而不能爲吉凶也應曰此相似而不同卜者吉凶無豫待物而應將來之地也相宅不問居者之賢愚惟觀已然有傳者已成之形也猶觀龍顏而知當貴見縱理而知餓死然各有由不爲闇中也今見其同於得吉凶因謂相宅與卜不異此猶見琴而謂之篳篥非但不知琴也縱如論宅與卜同但能知而不能爲則吉凶已成雖知何益卜與

不卜了無所在而古人將有爲必曰問之龜筮
吉以定所由差此豈徒也哉此復吾之所疑也
武王營周則云考卜惟王宅是鎬京周公遷邑
乃卜澗瀝終惟洛食又曰卜其宅兆而安厝之
古人脩之於昔如彼足下非之於今如此不知
誰定可從論曰爲三公宅而愚民必不爲三公
可知也或曰愚民必不得久居公侯宅然則果
無宅也應曰不謂吉宅能獨成福但謂君子旣
有賢才又卜其居復順積德乃享元吉猶夫良

農旣懷善藝又擇沃土復加耘耔乃有盈倉之報耳今見愚民不能得福於吉居便謂宅無善惡何異觀種田之無十千而謂田無壞堵耶良田雖美而稼不獨茂卜宅雖吉而功不獨成相須之理誠然則宅之吉凶未可惑也今信徵祥則棄人理之所宜守卜相則絕陰陽之吉凶持知力則忘天道之所存此何異識時雨之生物因垂拱而望嘉穀乎是故疑怪之論生偏是之議興所託不一烏能相通若夫兼而善之者得

無半非家宅耶論曰時日譴崇古盛王無之季
王之所好聽此言善矣顧其不盡然湯禱桑林
周公秉圭不知是譴崇非也吉日惟戊旣伯旣
禱不知是時日非也此皆足下家事先師所立
而一朝背之必若湯周末爲盛王幸更詳之又
當知二賢何如足下耶論曰賊方至以疾走爲
務食不消以黃丸爲先子徒知此爲賢於安須
更與求乞胡而不知制賊病於無形事功幽而
無跌也夫救火以水雖自多於抱薪而不知曲

突之先物矣况乎天下微事言所不能及數所不能分是以古人存而不論神而明之遂知來物故能獨觀於萬化之前收功於大順之後百姓謂之自然而不知所以然若此豈常理之所逮耶今形象著明有數者猶尚滯之天地廣遠品物多方智之所知未若所不知者衆也今執辟穀之術謂養生已備至理已盡馳心極觀齊此而還意所不及皆謂無之欲據所見以定古人之所難言得無似螻蛄之議冰耶欲以所識

而之所棄得無似戎人問布於中國觀
麻種而不事耶吾怯於專斷進不敢定禍福於
卜相退不敢謂家無吉凶也

宅無吉凶攝生論附

夫善求壽疆者必先知災疾之所自來然後
其至可防也禍起於此爲防於彼則禍無自
瘳矣世有安宅葬埋陰陽度數刑德之忌是
何所生乎不見性命不知禍福也不見故妄
求不知故于幸是以善執生者見性命之所

宜知禍福之所來故求之實而防之信夫多
飲而走則爲澹交數行而風則爲癢毒久居
於濕則憂疾偏枯好肉不怠則昏喪文房若
此之類災之所以來壽之所以去也而搢基
築宅費日苦身以求之疾生於形而治加於
土木是疾無瘳矣詩曰愷悌君子求福不回
者匪避誹謗而爲義然也蓋知回匪所求福
也故壽疆專氣致柔少私寡欲直行情性之
所宜而合於養生之正度求之於懷抱之內

而得之矣嘗有不知蠶者出口動手皆爲忌
祟旣得蠶絲滋甚爲忌祟滋多猶自以犯之
也有教之知蠶者其顛於桑火寒暑燥濕也
於是百思自息而利十倍何者先不知所以
然故忌祟之情繁後知所以然故求之之術
正故忌祟生於不知使知性猶如蠶則忌祟
無所立矣多食不消含黃丸而筮祝譴祟或
從乞胡求福者凡人皆所笑之何者以智能
達其無禍也故忌祟舉生於不知由知者言

之皆乞胡也設爲三公之宅而令愚民居之
必不爲三公可知也夫壽夭之不可求甚於
貴賤然則擇百年之宮而望殤子之壽孤逆
魁圖以速彭祖之夭必不幾矣或曰愚民必
不得久居公侯宅然則果無宅也是性命自
然不可求矣有賊方至不疾逃獨安須臾遂
爲所虜然則避禍趣福無過緣理避賊之理
莫如速逃則斯善矣養生之道莫如先知則
爲盡矣夫避賊宜速章章然故中人不難規

避禍之理冥冥然故明者不易見其於理動
不可要求一也孔子有疾醫曰子居處適也
飲食藥也有疾天也醫壽能事是以知命不
憂原始反終遂知死生之說夫時日譴崇古
之盛王無之而季王之所好聽也制壽宮而
得天短求百男而無立嗣必占不啓之陵而
陵不宿草何者高臺深宮以隔寒暑靡色厚
味以毒其精亡之於實而求之於虛故性命
不遂也或曰所問之師不工則天下無工師

矣夫一棲之雞一欄之羊賓至而有死者豈
居異哉故命有制也知命者則不滯於俗矣
若許負之相條侯英布之黥而後王彭祖七
百殤子之夭是皆性命也若相宅質居自東
徂西而得反此是藏性命之宜孔子登東山
而小魯登泰山而小天下立高丘而觀居民
則知曰東西非禍福矣若乃忘地道之爽塏
而立制於帷牆則所見滋褊從達者觀之則
夫乾確然示人易矣夫坤隤然示人簡矣天

地易簡而懼以細苛是更所以爲逆也是以君子奉天明而事地察世之工師占成居則驗使造新則無徵世人多其占舊因求其造新是見舟之行於水而欲推之於陸是不明數也夫舊斷之理猶卜筮也夫鑿龜數筮可以知吉凶然不能爲吉凶何者吉凶可知而不可爲也夫先筮吉卦而後名之無福猶先築利宅而後居之無報也占舊居以譴崇則可安新居以求福則不可則猶卜筮之說耳

俗有裁衣種穀皆擇日衣者傷寒種者失澤
凡火流寒至則授衣時雨旣降則當下種賊
方至則當疾走今舍實趣虛故三患隨至凡
以忌崇治家者求福而其極皆貧故有知星
宿衣不覆之諺古言無虛不可不察也

釋難宅無吉凶攝生論附

易曰河出圖洛出書聖人則之孝經曰爲之
宗廟以鬼享之其立本有如此者子貢稱性
與天道不可得聞仲由問神而夫子不答其

抑末有如彼者是何也茲所謂明有禮樂腦
有鬼神人謀鬼謀以成天下之亹亹也是以
墨翟著明鬼之篇董無心設難墨之說二賢
之言俱不免於殊途而兩惑是何也夫甚有
之則愚甚無之則誕故二子者皆偏辭也子
之言神將爲彼耶唯吾亦不敢明也夫私神
立則公神廢邪忌設則正忌喪宅墓占則家
道苦背向繁則妖心興子之言神其爲此乎
則唯吾之所疾爭也苟大獲其類不思微細

是以見餅水而知天下之寒察旋機而得日月之動足下細蠶種之說因忽而不察是噎溺未知所在亦莫辨有舟稼也夫蠶者所稟之分也信順者成命之理也故曰君子脩身以俟命知命者不立於巖墻之下何者是天遂之寶也猶食非命而命必胥食故然矣若吾論曰居怠行逆不能令彭祖天則足下舉信順之難疑也論之竊說信順既脩則宅葬無貴故辟之壽宮無益殤子耳足下不云殤

子以宅延彭祖亦以宅壽壽夭之說使之灼然若信順之遂期急遵之天性而徒曰天下或有能說之者予而不言誰與能之夫多食傷性良藥已病相之所一也誣彼實此非所以相證也夫壽夭不可求之宅而得之私故論有不知之 足下忘於意而責於文抑不本矣雖曰唐虞之世命何同延長平之卒命何同短今論命者當辨有無無疑衆寡也苟一人有命千萬皆一也若使此不得係命將

係宅耶則唐虞之世宅何同吉長平之卒居
何同凶亦復吾之所疑也難曰事之在外而
能爲害者不以數盡豈豹恃內而有虎按足
下之言是豹忘所宜懼與羅所宜忘故張毅
脩表亦有內熱之禍雖內外不同鈞其非和
一瞽失之終身弗復是亦虎隨其後矣夫謹
於邪者慢於正詳於宅者畧於和以爲先
亦非齊於所稱也今足下廣之望之久矣元
亨利貞卜之吉繇隆準龍顏公侯之相者以

其數所遇而形自然不可爲也使準顏可假
則無相繇吉可爲則無卜矣今設爲吉宅而
幸福報譬之無以異假顏準而望公侯也是
以子陽鏤掌巨君運魁咸無益於敗亡故吾
以無故而居者可占何惑象數之理也設吉
而後居者不可則何假爲之說也然則非宅
制人人實徵宅耶其無宅也似未思其本耳
獵夫從林其所遇者或禽或虎遇禽所吉遇
虎所凶而虎也善卜可以知之耳是故知吉

凶非爲吉凶也故其稱曰無遠近幽深遂知
來物不曰遂爲來物矣然亦卜之盡蓋理所
以成相命者也至于世與年則無益於周
錄矣若龜之吉凶有虎禽之類然此地苟惡
則常所往皆凶不得以西東有異背向不同
宮姓無害商則爲災福德則吉至刑禍則凶
來也故詩云築室百堵西南其戶古之營居
宗廟爲先廡庫次之居室爲後緣人理以從
事以此議之卽知無太歲刑德也若脩吉無

違亦宜吾論如無所 不知誰從韓曰不謂
言宅能獨成福猶夫良農既懷善藝又擇沃
土復加耘耔乃有盈倉之報此言當哉誠三
者能脩則農事畢矣若或盡以邪用求之於
虛則宋人所謂予助苗長敗農之道也今以
冢宅喻此宜何比耶爲樹藝乎爲耘耔也若
三者有比則請事後說若其無徵則愈見其
誣矣今卜相有徵如彼冢宅無驗如此非所
以相半也按書周公有請命之事仲尼非子

路之禱今鉤聖而鉤疾何是非不同也故知
臣子之心盡斯心而已所謂禮爲情貌者故
於臣第則周公請命親其身則尼父不禱足
下圖宅將爲禮也其爲實也爲禮則事異於
吉爲實則未聞顯理如是未得吾所以爲遺
而足下失所願矣至於時日先王所以誠不
怠而勸從事耳俗之時日順妖忌而逆事理
時名雖同其用適反以三賢校君愈見其合
未知所異也難曰智之所知未若所不知者

衆此較通世之常滯也然智所不知至可以
妄求智所能知惡其以學哉故古之君子脩
身擇術成性存存自盡焉而已矣今據足下
所言在所知耶則可辨也所不知耶則妄求
也二者宜有一於此矣夫小知不及大知故
乃反於有無爲有者亦螻蛄矣子尤吾之驗
於所齊吾亦懼子遊非其域儻有忘歸之累
也

答釋難宅無吉凶攝生論

夫先王垂訓開端中人言之所樹賢愚不違事之所由古今不忒所以致教也若玄機神妙不言之化自非至精孰能與之故善求者觀物於微觸類而長不以已爲度也按如所論甚有則愚甚無則誕今使小有便得不愚耶了無乃得離之也若小有則不愚吾未知小有其限所止也若了無乃得離之則甚無者無爲謂之誕也又曰私神立則公神廢然則惡夫私之害公邪之傷正不爲無神也向墨子立公神之情狀不

甚有之說使董生託正忌之塗無不甚無之言
二賢雅趣可得合而一兩無不失耶今之所辨
欲求實有實無以明自然不詭持論有工拙議
教有精粗也尋雅論之指謂河洛不誠借助鬼
神故爲之宗廟以神其本不答子貢以求其然
則足下得不爲託心無鬼 齊契於董生耶而
復顯古人之言懼無鬼之弊貌與情乖立從公
廢私之論欲彌縫兩端使不愚不誕兩譏董墨
謂其中央可得而居恐辭辨雖巧難可俱通又

非所望於覈論也故吾謂古人合德天地動應自然經世所立莫不有徵豈匿設宗廟以期後嗣空借鬼神以調將來耶足下將謂吾與墨不殊今不辭同有鬼但不偏守一區明所當然使人鬼同謀幽明並濟亦所以求衷所以爲異耳論曰鈞疾而禱不同故於臣第則周公請命親其身則尼父不禱所謂禮爲情貌者也難曰若於臣子則宜脩情貌未聞舜禹有請君父也若於身則否未聞武王闕禱之命也湯禱桑林復

爲君父耶推此而言宜以禱爲益則湯屈用之
禱無所行則孔子不請此其殊塗同歸隨時之
義也又曰時日先王所以誠不怠而勸從事足
下前論云時日非盛王所有故吾問惟戊之事
今不答惟戊果是非而曰所誠勸此復兩許之
言也縱令惟戊盡於誠勸尋論按名當言有日
耶無日耶又曰俗之時日順妖忌而逆事理按
此言以惡夫妖逆故去之未爲盛王了無日也
夫時日用於盛世而來代襲以妖惑猶先王制

雅樂而季世繼以淫哇也。今憤妖忌因欲去日
何異惡鄭衛而滅韶武耶。不思其本見其所弊
輒疾而欲除得不爲過。噓溺而遷怒耶。足下旣
已善卜矣。乾坤有六子。交幹有剛柔。統以陰陽
錯以五行。故吉凶可得而時。日是其所由。故古
人順之焉。有善其流而惡其源者。吾未知其可
也。至於河洛宗廟則謂匿而不信。類禡祈禱則
謂僞而無實。時日剛柔則謂假以爲勸。此聖人
專造虛詐以欺天下匹夫之諒。且猶耻之。今議

古人得無不可乃爾也凡此數事猶陷於誣妄
冢宅之見伐不亦宜乎前論曰若許負之相條
侯英布之黥而後王一欄之羊賓至而有死者
性命之自然也今論曰隆準龍顏公侯之相不
可假求此爲相命自有一定相所當成人不能
壞相所當敗智不能救陷常生於衆險雖可懼
而無患抑當貴於厮養雖辱賤而必貴薄姬之
困而後昌皆不可爲不可求而闇自遇之全相
之論必當若此乃一途得通本論不滯耳吾適

以信順爲難則便曰信順者成命之理必若所言命以信順成亦以不信順敗矣若命之成敗取足於信順故是吾前難壽夭成於愚智耳安得有性命自然也若信順果成相命請問亞夫由幾惡而得餓英布係何德以致王生羊積幾善以獲存死者負何罪以逢災耶旣持相命復惜信順欲飾二論使得並通恐似矛盾無俱立之勢非辯言所能兩濟也論曰論相命當辨有無無疑衆寡苟一人有命則長平皆一矣又曰

知命者不立巖牆之下吾謂知命者當無所不
順乃畏巖牆知命有在立之何懼若巖牆果能
爲害不擇命之長短則知與不知立之有禍避
之無患也則何知白起非長平之巖牆而云千
萬皆命無疑衆寡耶若謂長平雖同於巖牆故
是相命宜值之則命所當至期於必然不立之
誠何所施耶若此果有相也此復吾之所疑也
父曰長平不得係於命將係宅耶則唐虞之世
宅何同吉本疑前論無非相命故借長平之異

同以難相命之必然廣求異端以明事理豈必
吉宅以質之耶又前論已明吉宅之不獨行今
空抑此言欲以誰難又曰長平之卒宅何同凶
苟大同足嫌足下愚於吾也適至守相便言千
萬皆一校以至理負情之對於是乎見旣虛立
吉宅而無獲欲救相命而情以難顯故如
此可謂善戰矣論曰卜之盡蓋理所以成相命
者也此復吾所疑矣前論以相命爲主而尋益
以信順此一離婁也今復以卜成之成命之具

三而猶不知相命竟須幾箇爲足也若惟信願
於理尙少何以謂成命之理耶若是相濟則卜
何所補於卜復曰成命耶請問卜之成命使單
豹行卜知將有虎災則隱居深宮嚴備自衛若
虎猶及之爲卜無所益也何云成相耶若謂豹
卜而得脫本無厄虎相也卜爲妄語矣若謂凡
有命皆當由卜乃成則世有終身不卜者皆失
相夭命耶若謂卜亦相也然則卜是相中一物
也安得云以成相耶若此不知卜筮故當與相

命通相成爲不當各自行也論曰無故而居可
占猶龍顏可相也設爲吉宅而後居以幸福報
無異假顏準而望公侯也然則人實徵宅非宅
制人也按如所言無故而居可占者必謂當吉
人之瞑目而前推遇任命以閭營宅自然遇吉
也然則豈獨吉人凡有命者皆可以閭動而自
得正是前論命自然不可增減者也驟以可爲
之信順上筮成不可增減之命矣奚獨禁可爲
之宅不盡相命唯有閭作乃是真宅耶若瞑目

可以得相開目亦無所加也智者愈當職之厚
公營居何故躊躇於澗瀍間龜筮而食洛耶若
龜筮果有助於爲宅則知閭作可有不盡善之
理矣苟閭作有不盡則不閭豈非求之術耶若
必謂龜筮不能盡相於閭往想亦不失相於考
上也則卜與不卜爲與不爲皆期於自得自得
苟全則善占者所遇當識何得無故則能知有
故則不知也然貞宅之異假顏貴夫無故識之
貞宅之與設爲其形不同以功成俱是吉宅也

但無故爲貞宅授吉於閭遇設爲滅福於用知爾然則吉凶之形果自有理可以爲故而得故前論有占成之驗也然則占成之形何以言之必遂遠近得宜堂廉有制坦然殊觀可得而別利人以福故謂之吉害人以禍故謂之凶但公侯之相聞與吉會爾然則宅與性命雖各一物猶農夫良田合而成功也設公侯遷後方樂其吉而往居之吉宅豈選能而後納擇善而後福哉苟宅無情於擇賢不惜吉於設爲則屋不辭

人田不讓耕其所以爲吉凶薄厚何得不諄諄
吉者不求而過後聞吉而往同於居吉宅而有
求與不求矣何言誕而不可爲也由是言之非
從人而徵宅亦成人明矣若挾頽狀則英布黥
相不減其貴隆準見劓不減公侯之標是知頽
準是公侯之標識非所以爲公侯質也故標識
者非公侯質也吉名宅宇與吉者宅實也無吉
徵而自宅以徵假見難可也若以非質之標識
難有徵之吉宅此吾所不敢許也子陽無質而

鏤其掌卽知當字長耳巨君篡宅而運其魁卽
偏恃之禍非所以爲難也至公侯之命稟之自
然不可陶易宅是外物方圓由人有可之理
猶西施之潔不可爲而西施之服可爲也黼黻
芳華所以助吉宅家所以成相故世無人
方而有卜宅是以知人宅不可相喻也安得以
不可作之人絕可作之宅耶至刑德皆同此一
家非本論占成居而得吉凶者也且先了此乃
議其餘論曰獵夫從林所遇或禽或虎虎凶禽

吉卜者筮而知之非能爲安知所言地之善惡
猶禽吉虎凶獵夫先筮故擇而從禽如擇居故
避凶而從吉吉地雖不可爲而可擇處猶禽虎
雖不可變而可擇從苟卜筮所以成相虎可卜
而地可擇何爲半信而半不信耶又云地之吉
凶有若禽虎不得宮姓則無害商則爲災也案
此爲怪所不解而以爲難似未察宮商之理也
雖此理之吉而或長於養宮短於毓商猶良田
雖美而稼有所宜何以言之人姓有五音五行

有相生故同姓不昏惡不殖也人誠有之地亦
宜然故古人仰準陰陽俯協剛柔中識性理使
三才相善同會於大通所以窮理而盡物宜也
夫同聲相應同氣相求自然之分也音不和則
比絃不動聲同則雖遠相應此事雖著而猶莫
或識苟有五音各有宜土氣有相生則人宅猶
禽虎之類豈可見宮商之不同而謂之地無吉
凶也論曰天下或有能說之者子而不言誰與
能之難曰足下前論以云有能占成居者此卽

能說之矣故吾曰天下當有能者今不求之於
前論而復責吾難之於能言亦當知家宅有吉
凶也又曰藥之已病爲一也實而宅之吉凶爲
一也誣旣曰成居可占而復曰誣耶藥之已病
莫驗又見故君子信之宅之吉凶其報賒遙故
君子疑之今若以交賒爲虛則恐所以求物之
地鮮矣吾見溝澮不疑江海之大觀丘陵則知
有泰山之高也若守藥則棄宅見交則非賒是
海人所以終身無山山客曰無大魚也論曰智

之所知未若所不知不可妄論也難曰智所不知相必亦未知也今暗許便多於所知者何耶必生於本謂之無而彊以驗有也彊有之驗將不盈於數矣而并所成驗者謂之多於所知耳苟知然果有未還之理不因見求隱尋論究緒由而得卯未夫尋端之理猶獵師以得禽也縱使尋迹時有無獲然得禽曷嘗不由之哉今吉凶不先定則謂不可求何異獸不期則不敢訊舉氣足坐守無根也由此而言探願

索隱何謂爲妄

嵇中散集卷之六

魏譙國嵇康叔夜著

明閩漳張熒紹和纂

論

難自然好學論

夫民之性好安而惡危好逸而惡勞故不擾則其願得不逼則其志從洪荒之世大朴未虧君無文於上民無競於下物全理順莫不自得飽則安寢饑則求食怡然鼓腹不知爲至德之世

也若此則安知仁義之端禮律之文及至人不
存大道陵遲乃始作文墨以傳其意區別群物
使有類族造立仁義以嬰其心制其名分以檢
其外勸學講文以神其教故六經紛錯百家繁
熾開榮利之塗故奔騖而不覺是以貪生之禽
食園池之梁菽求安之士乃詭志以從俗操筆
執觚足容蘇息積學明經以代稼穡是以困而
後學學以致榮計而後習好而習成有似自然
故令吾子謂之自然耳推其原也六經以抑引

爲主人性以從欲爲欲抑引則達其欲從欲則
得自然然則自然之得不出抑引之六經全性
之本不須犯情之禮律故仁義務於理僞非養
真之要術廉讓生於爭奪非自然之所出也由
是言之則鳥不毀以求馴獸不群而求畜則人
之真性無爲正當自然就此禮學矣論又云嘉
肴珍膳雖所未嘗嘗必美之適於口也處在閤
室觀烝燭之光不教而悅得於心況以長夜之
冥得照太陽情變鬱陶而發其蒙雖事以未來

情以本應則無損於自然好學難曰夫口之於
甘苦身之於痛癢感物而動應事而作不須學
而後能不待借而後有此必然之理吾所不易
也今子以必然之理喻未必然之好學則恐似
是而非之議學如一粟之論於是乎在也今子
立六經以爲準仰仁義以爲主以規矩爲軒冕
以講誨爲哺乳由其塗則通乖其路則滯遊心
極視不覩其外終年馳騁思不出社聚族獻議
唯學爲貴執書摘句俛仰咨嗟使服膺其言以

爲榮華故吾子謂六經爲太陽不學爲長夜耳
今若以講堂爲丙舍以誦諷爲鬼語以六經爲
蕪穢以仁義爲臭腐覩文籍則目眊脩揖讓則
變傴僂章服則轉筋譚禮典則齒齟於是兼而
棄之與萬物爲更始則吾子雖好學不倦猶將
闕焉則向之不學未必爲長夜六經未必爲太
陽也俗語曰乞兒不辱馬醫若遇上有無文之
始可不學而獲安不勤而得志則何求於六經
何欲於仁義哉以此言之則今之學者豈不先

計而後學苟計而後動則非自然之應也子之云云恐故得菖蒲菹耳

張遼叔自然好學論附

夫喜怒哀樂愛惡欲懼人之有也得意則喜見犯則怒乖離則哀聽和則樂生育則愛違好則惡饑則欲食逼則欲懼凡此八者不教而能若論所云卽自然也腥臊未化餒飢茹毛以克其虛食之始也茹之火齊糝黽蘭櫛雖所未嘗嘗必美之適於口也蕢桴土鼓撫

腹而吟足之蹈之以娛其喜樂之心質也加之以
管絃雜以羽毛雖所未聽察之必樂當其心
也民生也直聚而勿教肆心觸意八情必發
喜必欲與怒必欲罰無爪牙以奮其威無爵
賞以稱其惠愛無以奉惡不能去有言之曰
苴竹管蒯所以表哀溝池嶮阻所以寬懼弦
木剝金所以解憤豐財殖貨所以施與苟有
肺腸誰不忻然貌悅心釋哉尙何假於食膽
蜚而嗜菖蒲菹也且晝坐夜寢明作闇息天

道之常人所服習在於幽室之中覩烝燭之光雖不教告亦皎然喜於所見也不以向有白日與比朱門旦則復曉不揭此明而滅其歡也況以長夜之冥得照太陽情變鬱陶而發其蒙也故以爲難事以未來而情以本應即使六藝紛華名利雜詭計而復學亦無損於有自然之好也

明膽論

有呂子者精義味道研覈是非以爲人有膽可
無明有明便有膽矣稽先生以爲明膽殊用不
能相生論曰夫元氣陶鑠衆生稟焉賦受有多
少故才性有昏明惟至人特鍾純美兼周外內
無不畢備降此已往蓋闕如也或明於見物或
勇於決斷人情貪廉各有所止譬諸草木區以
別矣兼之者博於物偏受者守其分故吾謂明
膽異氣不能相生明以見物膽以決斷專明無

膽則雖見不斷專膽無明則達理失機故子家
軟弱陷於弑君左師不斷見逼華臣皆智及之
而決不行也此理坦然非無疑滯故畧舉一隅
想不重疑

呂子曰敬覽來論可謂海亦不加者矣折理貴
約而盡情何尚浮穢而迂誕哉今予之論乃引
渾元以爲喻何遼遼而坦謾也故直荅以人事
之切要焉漢之賈生陳切直之策奮危言之至
行之無疑明所察也忌鵬作賦暗所惑也一人

之膽豈有盈縮乎蓋見與不見故行之有果否也子家左師皆愚惑淺弊明不徹達故惑於曖昧終丁禍害豈明見照察而膽不斷乎故霍光懷沈勇之氣履上將之任戰乎王賀之事延年文生夙無武稱陳義奮辭膽氣凌雲斯其驗歟及於期授首陵母伏劒明果之疇若此萬端欲詳而載之不可勝言也況有覩夷塗而無敢投足階雲路而疑於迄泰清者乎若思弊之倫爲能自託幽昧之中棄身陷阱之間如盜跖竄身

於虎吻穿窬先首於溝瀆而暴虎馮河果敢之類則能有之是以余謂明無膽無膽能偏守易了之理不在多喻故不遠引繁言若未反三隅猶復有疑思承後誨得一騁辭

夫論理性情折引異同固尋所受之終始推氣分之所由順端極末乃不悖耳今子欲棄置渾元據撫所見此爲好理綱目而惡持綱領也本論二氣不同明不生膽欲極論之當令一人播無刺諷之膽而有見事之明故當有不果之害

非中人血氣無之而復資之以明二氣存一體
則明能運膽賈誼是也賈誼明膽自足相經故
能濟事誰言殊無膽獨任明以行事者乎子獨
自作此言以合其論也忌鵬聞惑明所不周何
害於膽乎明旣以見物膽能行之耳明所不見
膽當何斷進退相扶可謂盈縮就如此言賈生
陳策明所見也忌鵬作賦聞所惑也爾爲明徹
於前而聞惑於後有盈縮也苟明有進退膽亦
何爲不可偏乎子然霍光有沉勇而戰於廢王

有所撓也而子言一人膽豈有盈縮此則是也
賈生聞鵬明有所塞也光懼廢立勇有所撓也
夫唯至能無所虧耳苟自非若此誰無弊損乎
但當總有無之大畧而致論之耳夫物以實見
爲主延年奮發勇義凌雲此則膽也而云夙無
武稱此爲信宿稱而疑成事也延年處議明所
見也壯氣騰厲勇之決也此足以觀矣于又曰
言明無膽無膽能偏守案子之言此則有專膽
之人亦爲膽特自一氣矣五才存體各有所生

明以陽耀膽以陰凝豈可爲有陽而生陰可無
陽耶雖相須以合德要自異氣也凡餘雜說於
期陵母暴虎云云萬言致一欲以何明耶幸更
詳思不爲辭費而已矣

管蔡論

或問曰案記管蔡流言叛戾東都屬公征討誅以凶逆頑惡顯著流名千里且明父聖兄曾不鑒凶愚於幼稚覺無良之子弟而乃使理亂殷之弊民顯榮爵於藩國使惡積罪成終遇禍害於理不通心無所安願問其說答曰善哉子之問也昔文武之用管蔡以實周公之誅管蔡以權權事顯實事沉一作沉故令時人全謂管蔡爲頑凶方爲吾子論之夫管蔡皆服教殉義忠誠

自然是以文王列而顯之發旦二聖舉而任之
非以情親而相私也乃所以崇德禮賢濟殷弊
民綏輔武庚以興頑俗功業有績故曠世不廢
名冠當時列爲藩臣逮至武卒嗣誦幼冲周公
踐政率朝諸侯思光前載以隆王業而管蔡服
教不達聖權卒遇大變不能自通忠疑乃心思
在王室遂乃抗言率衆欲除國患翼存天子其
心毀旦斯乃愚誠憤發所以徼福也成王大悟
周公顯復一化齊俗義以斷恩雖內信如心外

而不立稱兵叛亂所惑者廣是以隱忍授刑流涕行誅示以賞罰不避親戚榮爵所顯必鍾盛德戮捷所施必加有罪斯乃爲教之正今之朝議管蔡雖懷忠抱誠要爲罪誅罪誅已顯不得復理內必幽伏罪惡遂章幽章之路大殊故令奕世未蒙發起然論者誠名信行便以管蔡爲惡不知管蔡之惡乃所以令三聖爲不明也若三聖未爲不明則聖不祐惡而任頑凶不容於時世則管蔡無取私於父兄而見任必以忠良

則二叔故爲淑善矣今若本三聖之用明思顯授之實理推忠賢之闇權論爲國之大紀則二叔之良乃顯三聖之用也以流言之故有緣周公之誅是矣且周公居攝邵公不悅推此言則管蔡懷疑未爲不賢而忠賢可不達權三聖未爲用惡而周公不得不誅若此三聖所用信良周公之誅得宜管蔡之心見理爾乃大義得通外內兼叙無相伐負者則時論亦得釋然而大解也

贊

原憲贊

原憲味道財寡義豐栖遲華門安賤固窮絃歌
自樂體逸心冲進應子貢邈有清風

黃帝遊襄城贊

奇矣難測襄城小童倦遊六合來憇茲邦

箴

太師箴

浩浩太素陽曜陰凝二儀陶化人倫肇興厥初
冥昧不慮不營欲以物開患以事成犯機觸害
智不收生宗長歸仁自然之情故君道自然必
託賢明茫茫在昔罔或不寧赫胥旣往紹以皇
羲默靜無文大朴未虧萬物熙熙不夭不離爰
及唐虞猶篤其緒體資易簡應天順矩絺褐其
裳土木其宇物或失性懼若在于疇咨熙載終

禪舜禹夫統之者勞仰之者逸至人重身棄而
不恤故子州稱疾石戶乘桴許由鞠躬辭長九
州先王仁愛愍世憂時哀萬物之將頽然後蒞
之下逮德衰大道沉淪智惠日用漸私其親懼
物乖離物擘仁利巧愈競繁禮屢陳刑教爭
施天性喪真季世陵遲繼體承資憑尊恃勢不
友不師宰割天下以奉其私故君位益侈臣路
生心竭智謀國不吝灰沉賞罰雖存莫勸莫禁
若乃驕盈肆志阻兵擅權矜威縱虐禍蒙丘山

刑本懲暴今以脅賢昔爲天下今爲一身下疾
其上君猜其臣喪亂弘多國乃殞顛故殷辛不
道首綴素旗周朝敗度彘人是謀楚靈極暴乾
谿潰叛晉厲殘虐樂書作難主父棄禮穀胎不
宰秦皇荼毒禍流四海是以亡國繼踵今古相
承醜彼摧滅而襲其亡徵初安若山後敗如崩
臨亦振鋒悔何所增故居帝王者無曰我尊慢
爾德音無曰我彊肆于驕淫棄彼佞倖納此逕
顏諛言順耳染德生患悠悠庶類我控我告唯

賢是授何必親戚順乃造好民實胥效治亂之
原豈無昌教穆穆天子思問其僊虚心導人允
求讜言師臣司訓敢告在前

誠

家誠

人無志非人也但君子用心所欲準行自當量
其善者必擬議而後動若志之所之則口與心
誓守死無二耻躬不逮期於必濟若心疲體懈
或牽於外物或累於內欲不堪近患不忍小情
則議於去就議於去就則二心交爭二心交爭
則向所見役之情勝矣或有中道而廢或有不
成一簣而敗以之守則不固以之攻則怯弱與

之誓則多違與之謀則善泄臨樂則肆情處逸則極意故雖繁華熠熠無結秀之勲終年之勤無一旦之功斯君子所以歎息也若夫申胥之長吟夷齊之全潔展季之執信蘇武之守節可謂固矣故以無心守之安而體之若自然也乃是守志之盛者可耳所居長吏但宜敬之而已矣不當極親密不宜數徃徃當有時其衆人又不當宿留所以然者長吏喜問外事或時發舉則怨或者謂人所說無以自免也若行寡言慎

儲留守則怨責之路解矣其立身當清遠若有
煩辱欲人之盡僉託人之請求當謙辭謝其
素不預此輩事當相亮耳若有怨急心所不忍
可外遠拒密爲濟之所以然者上遠宜適之幾
中絕常人淫輩之求下全束脩無玷之稱此又
秉志之一隅也凡行事先自審其可不差於宜
宜行此事而人欲易之當說宜易之理若使彼
語殊佳者勿羞折遂非也若其理不足而更以
情求來守人雖復云云當堅執所守此又秉志

之一隅也不須行小小束脩之意氣若見窮之
而有可以賑濟者便是義而作若人從我欲有
所求先自思省若有所損廢多於今日所濟之
義少則當權其輕重而拒之雖復守辱不已猶
當絕之然大率人之告求皆彼無我有故來求
我此爲與之多也自不如此而爲輕竭不忍面
言疆副小情未爲有志也夫言語君子之機機
動物應則是非之形著矣故不可不慎若於意
不善了而本意欲言則當懼有不了之失且權

然之後視向不言此事無他不可則向言或有
不可然則能不言全得其可矣且俗人傳言遲
傳凶疾又好議人之過闕此常人之議也坐言
所言自非高議但是動靜消息小小異同但當
高視不足和荅也非義不言詳靜敬道豈非寡
悔之謂人有相與變爭未知得失所在慎勿預
也且默以觀之其非行自可見或有小是不足
是小非不足非至竟可不言以待之就有人問
者猶當辭以不解近論議亦然若會酒坐見人

爭語其形勢似欲轉盛便當亟舍去之此將闕
之非也坐視必見曲直黨不能不有言有言必
是在一人其不是者方自謂爲直則謂曲我者
有私於彼便怨惡之情生矣或便獲悖辱之言
正坐視之大見是非而爭不了則仁而無武於
義無可當遠之也然大都爭訟者小人耳正復
有是非共濟汗漫難勝可足稱哉就不得遠取
醉爲佳若意中偶有所諱而彼必欲知者若守
大不已或劫以鄙情不可憚此小輩而爲所撓

引以盡其言今正堅語不知不識方爲有志耳
自非知舊鄰比庶幾已下欲請呼者當辭以他
故勿往也外榮華則少欲自非至急終無求欲
上美也不須作小小卑恭當大謙裕不須作小
小廉耻當全大讓若臨朝讓官臨義讓生若孔
文舉求代兄死此忠臣烈士之節凡人自有公
私慎勿強知人知彼知我知之則有忌於我今
知而不言則便是不知矣若見竊語私議便舍
起勿使忌人也或時逼迫強與我共說若其言

邪險則當正色以道義正之。侮者君子不容僞
薄之言故也。一旦事敗便言某甲昔知吾事以
宜備之深也。凡人私語無所不有。宜預以爲意。
見之而走者何哉。或偶知其私事與同則可不
同。則彼恐事泄。思害人以滅迹也。非意所欽者
而來戲調。虽笑人之闕者。但莫應從小。共轉至
於不共而勿大冰。矜趨以不言答之。勢不得久
行自止也。自非所監臨。相與無他。宜適有壺榼
之意。束脩之好。此人道所通。不須逆也。過此以

往自非通穆匹帛之饋車服之贈當深絕之何
者常人皆薄義而重利今以自矯者必有爲而
作鬻貨黷歡施而求報其俗人之所共趨而君
子之所大惡也
又憤不須離
樓強勸人酒不飲自己若人來勸已輒當爲持
之勿謂勿逆也見醉薰薰便止慎不當至因醉
不能自裁也

附錄

嵇康傳

唐太宗

嵇康字叔夜譙國銍人也其先姓奚會稽上虞人以避怨徙焉銍有嵇山家于其側因而命氏兄喜有當世才歷太僕宗正康早孤有奇才遠邁不群身長七尺八寸美詞氣有風儀而土木形骸不自藻飾人以爲龍章鳳姿天質自然恬靜寡慾含垢匿瑕寬簡有大量學不師受博覽無不該通長好老莊與魏宗室婚拜中散大夫

嘗脩養性服食之事彈琴詠詩自足於懷以爲
神仙稟之自然非積學所得至於導養得理則
安期彭祖之倫可及乃著養生論又以爲君子
無私著無私論蓋其胸懷所寄以高契難期每
思郢質所與神交者惟陳畱阮籍河內山濤預
其流者河內向秀沛國劉伶籍兄子咸琅邪王
戎遂爲竹林之游世所謂竹林七賢也戎自言
與康居山陽二十年未嘗見其喜愠之色康嘗
採藥游山澤會其得意忽焉忘反時有樵蘇者

遇之咸謂神至汲郡山中見孫登康遂從之游
登沈默自守無所言說康臨去登曰君性烈而
才雋其能免乎康又遇王烈共入山烈嘗得石
髓如飴卽自服半餘半與康皆凝而爲石又於
石室中見一卷素書遽呼康往取輒不復見烈
乃歎曰叔夜趣非常而輒不遇命也其神心所
感每遇幽逸如此山濤將去選官舉康自代康
乃與濤書告絕書旣行知其不可羈屈也性絕
巧而好鍛宅中有一柳樹甚茂乃激水圍之每

夏月居其上以鍛東平呂安服康高致每一相思輒千里命駕康友而善之後安爲兄所枉訴以事繫獄辭相證引遂復收康康性慎言行一旦縲紲乃作幽憤詩初康居貧嘗與同秀共鍛於大樹之下以自贍給潁川鍾會貴公子也精練有才辨故往造焉康不爲之禮而鍛不輟良久會去康謂曰何所聞而來何所見而去會曰聞所聞而來見所見而去會以此憾之及是言於文帝曰嵇康卧龍也不可起公無憂天下顧

以康爲慮耳因譖康欲助母丘儉賴山濤不聽
昔齊戮華士魯誅少正卯誠以害時亂教故聖
賢去之康安等言論放蕩非毀興謨帝王者所
不宜容宜因釁除之以淳風俗帝旣昵聽信會
遂并害之康將刑東市太學生三千人請以爲
師弗許康顧見日影索琴彈之曰昔袁孝尼嘗
從吾學廣陵散吾每靳固之廣陵散於今絕矣
時年四十海內之士莫不痛之帝尋悟而恨焉
初康嘗游乎洛西暮宿華陽亭引琴而彈夜分

忽有客詣之稱是古人與康共談音律辭致清
辯因索琴彈之而爲廣陵散聲調絕倫遂以授
康仍誓不傳人亦不言其姓字康善談理又能
屬文其高情遠趣率然玄遠撰上古以來高士
爲之傳替欲友其人於千載也又作太師箴亦
足以明帝王之道焉復作聲無哀樂論甚有條
理子紹別有傳

弟康傳

晉書 喜

家世儒學少有儁才曠邁不群高亮任性不脩
名譽寬簡有大量學不師授博洽多聞長而好
老莊之業恬靜無欲性好服食常採御上藥善
屬文論彈琴詠詩自足于懷抱之中以爲神仙
者稟之自然非積學所致至於道養得理以盡
性命若安期彭祖之倫可以善求而得也著養
生篇知自厚者所以喪其所生其求益者必失
其性超然獨達遂放世事縱意於塵埃之表撰

錄上古以來聖賢隱逸遁名者集爲傳贊
自混沌至於管寧凡百一十有九人蓋求之於
宇宙之內而發之乎千載之外者矣故世人莫
得而名焉

與嵇康書

魏呂安

干寶晉紀云太祖逐呂安遠郡在路作書與康臧榮緒晉書云安妻甚美兄巽報之內慙誣安不孝啓太祖徙安遠郡卽路與康書太祖見而惡之收安付廷尉與康俱死康子紹家集云趙景真與從兄茂齊同年相親州辟至遼東從事始詣遼東時作此書與茂齊時人誤謂呂仲悌與先君書李善文選註云二說不同故題云景真而書曰安李周翰云晉紀闕史實有所憑紹之家集未足可據時紹以太祖惡安之書又安與康同誅懼時所疾故移此書於景真考其始末是安所作故以安爲定姑附載之

安白昔李叟入秦及關而歎梁生適越登嶽長

謹夫以嘉遁之舉猶懷戀恨况乎不得已者哉
惟別之後離群獨逝背榮宴辭倫好經迴路涉
沙漠鳴雞戒旦則飄爾晨征日薄西山則馬首
靡託尋歷曲阻沈思紆結乘高遠眺則山川悠
隔或乃迴飈狂厲白日寢光崎嶇交錯陵隰相
望徘徊九臯之內慷慨重阜之巔進無所依退
無所據涉澤求谿披榛覓路嘯詠溝渠良不可
度斯亦行路之艱難然非吾心之所懼也至若
蘭茝傾頓桂林移植根萌森樹而牙淺絃急常

惡風波潛駭危機密發斯所以怵惕於長衢按
轡而歎息者也又比土之性難以托根授人夜
光鮮不按劍今將植橘柚於玄朔帶華藕於脩
陵表龍章於裸壤奏韶武於蕤俗固難以取貴
矣夫物不我貴則莫之與莫之與則傷之者至
矣飄飄遠游之士託身無人之鄉總轡遐路則
有前言之艱懸鞍陋宇則有後慮之戒朝霞啓
暉則身疲於遄征太陽戢曜則情劬於夕惕肆
目平隰則遼廓而無覩極聽脩原則掩寂而無

聞吁其悲矣心傷悴矣然後乃知步驟之士不足爲貴也若乃顧景中原憤氣雲踊哀物悼世激情風烈龍睇大野虎嘯六合猛氣紛紜雄心四據思躡雲梯橫奮八極披艱掃穢蕩海夷岳蹴岷嶓使西倒蹋太山令東覆華滌九區恢維宇宙斯亦吾人之鄙願也時不我與垂翼遠逝鋒距靡加翹翮摧屈自非知命誰能不憤悒者哉吾子殖根芳苑濯秀清流布葉華崖飛藻雲肆俯據潛龍之淵仰蔭棲鳳之林榮曜眩其前

豔色餌其後良儔交其左聲名馳其右翺翔倫
黨之間弄姿帷房之裏從容顧盼綽有餘裕俯
仰吟嘯自以爲得志矣豈能與吾同大丈夫之
憂樂者哉去矣嵇生永離隔矣箠箠飄寄臨沙
漠矣悠悠三千路難涉矣攜手之期邈無日矣
思心稱結誰云釋矣無金玉爾音而有遐心身
雖胡越意存斷金各敬爾儀敦履璞沈繁華流
蕩君子弗欽臨書恨然知復何云

思舊賦

有序

晉陶秀

余與嵇康呂安居止接近其人並有不羈之才
然嵇志遠而疎呂心曠而放其後各以事見法
嵇博綜技藝於絲竹特妙臨當就命顧視日影
索琴而彈之余逝將西邁經其舊廬于時日薄
庾淵寒冰淒然鄰人有吹笛者發聲寥亮追思
曩昔遊宴之好感音而歎故作賦云

將命適於遠京兮遂旋反而北徂濟黃河以汎
舟兮經山陽之舊居瞻曠野之蕭條兮息余駕

乎城隅踐二子之遺跡兮歷窮巷之空廬歎黍
離之愍周兮悲麥秀於殷墟惟古昔以懷人兮
心徘徊以躊躇棟宇存而弗毀兮形神逝其焉
如昔李斯之受罪兮歎黃犬而長吟悼嵇生之
求辭兮顧日影而彈琴託運遇於領會兮寄餘
命於寸陰聽鳴笛之慷慨兮妙聲絕而復尋停
駕言其將邁兮遂援翰而寫心

吊嵇中散文

晉李 克

先生挺邈世之風資高明之質神蕭蕭以宏遠
志落落以遐逸忘尊榮於華堂括卑靜於蓬室
寧漆園之逍遙安柱下之得一寄欣孤松取樂
竹林尙想榮莊聊與抽簪味孫觴之濁醪鳴七
絃之清琴慕至人之玄旨詠千載之徽音凌晨
風而長嘯託歸流而詠吟乃自足於丘壑孰有
愠乎陸沉馬樂原而翹足龜悅塗而曳尾疇廟
堂而足榮豈和鈴之足視久先生之所期羗玄

達於遐音尙遺大以出生何難小而入死嗟乎
先生逢時命之不下輩後凋歲寒遭繁霜於
夏零滅皎皎之玉質絕琅琅之金聲援明珠以
彈雀捐所重而爲輕諒鄙心之不爽非大雅之
所營

吊嵇中散文

晉李氏

宣尼有言曰惟仁者能好人能惡人自非賢智之流不可以褒貶明德擬議英哲矣故彼嵇中散之爲人可謂命世之傑矣觀其德行奇偉風韻劭遠有似明月之映幽夜清風之過松林也若夫呂安者嵇子之良友也鍾會者天下之惡人也良友不可以不明明之而理全惡人不可以不拒拒之而道顯夜光匪與魚目比映三秀難與朝華爭榮故布鼓自嫌於雷門礫石有忌

於琳琅矣嗟乎道之喪也雖智周萬物不能違
顛沛之難故存其心者不以一青累懷檢乎跡
者必以纖芥爲事慨達人之獲譏悼高範之莫
全凌清風以三嘆撫茲予而悵焉聞先覺之高
唱理極滯其必宣候千載之大聖期五百之明
賢聊寄憤於斯章思慷慨而泫然

嵇中散贊

晉書 萬

邈矣先生英標秀士希巢洗心擬莊託相乃放
乃逸邁茲俗網鍾期不存奇賞誰賞

恨賦畧

梁江淹

中散下獄神氣激揚濁醪夕引素琴晨張秋日
蕭索浮雲無光鬱青霞之奇念入脩夜之不暘

七賢論

梁沈約

嵇生是上智之人，值無妄之日，神才高傑，故爲世道所莫容。風貌挺特，蔭映於天下，言理吐論，一時所莫能參。屬馬氏執國，欲以智計傾皇祚，誅鉏勝已，靡或有遺。玄伯太初之徒，竝出嵇生之流，咸已就戮。嵇審於此時，非自免之運，若登朝進仕，映邁當時，則受禍之速，過於旋踵。自非霓裳羽帶，無用自全，故始以餌木黃精，終於假塗託化。

五君嵇中散詠

宋顏延之

中散不偶世本自餐霞人形解驗默禪吐論知
凝神立俗迂流議尋山洽隱淪鸞翮有時鍛龍
性誰能馴

賦得嵇叔夜

梁庾肩吾

山林重明滅風月臨罽塵著書惟隱士談玄止
谷神鴈重翻傷性蠶寒更養身廣陵餘故曲山
陽有舊隣俗儉寧妨患才多反累身寄言山吏
部無以助庖人

遺事

嵇康身長七尺八寸風姿特秀見者歎曰蕭蕭
蕭蕭爽朗清舉或云蕭蕭如松下風高而徐引
山公曰嵇叔夜之爲人也巖巖若孤松之獨立
其醉也傀俄若玉山之將崩

世說新語

嵇中散語趙景真卿瞳子白黑分明有白起之

風悵量少狹

世說新語

嵇中散嘗於夜中燈火下彈琴有一人入室初
面甚小斯須轉太遂長丈餘嵇熟視旣久吹火

滅曰恥與魑魅爭光

世說新語

鍾會撰四本論始畢甚欲使嵇公一見置懷中

畏其難懷不敢出於戶外遙擲便回急走

世說新語

孫登字公和康從遊三年間其所圖終不荅將

別謂曰先生竟無言乎登曰子識火乎生而有

光而不用其光果然在於用光人生有才而不

用其才果然在於用才故用光在乎得薪所以

保其燿用才在乎識物所以全其年今子才多

識寡難乎免於今之世矣子無多求康不能用

文士

初，康平呂巽及巽弟安親善，會吳淦安妻徐氏而誣安不孝，囚之。安引康為證，康義不負。心保明其事，安亦至。烈有濟世志，力鍾會勸大將軍因此除之，遂殺安及康。

魏氏春秋

王濬冲為尚書令，經黃公酒壚，謂吾昔與嵇叔夜阮嗣宗共酣飲於此，竹林之遊亦預其末。自嵇生夭，阮公亡以來，便為時所羈縲。今視此雖

近邈若山河

世說新語

有人語王戎曰嵇延祖卓卓如野鶴之在雞群

答曰君未見其父耳

世說新語

白鹿山東南二十五里嵇公故居有遺竹焉

王戎
直記

集評

頗似魏文過爲峻切訐直露才傷淵雅之致然

託諭清遠良有鑒裁亦未失高流矣

詩品

叔夜儁俠故興高而采烈

文心
雕龍

嵇旨清峻

文心
雕龍

嵇康絕交志高文偉

文心
雕龍

顧愷之每重嵇康四言詩因爲之圖恒云手揮

五絃易目送歸鴻難

晉書

人品胸次高自然流出

詩譜